



# Regulativ d'indemnisaziun

## Revisiun parziala

### M E S S A D I

dalla suprastonza communal a cussegl da vischnaunca

Preziau signur president  
Preziadas signuras cusseglieras  
Preziai signurs cussegliers

La davosa revisiun dil regulativ d'indemnisaziun che normescha l'indemnisaziun dils commembers d'autoritads e da cumissiuns sco era d'ulteriurs funcziunaris va anavos sigl onn 2012.

En art. 3 dil reglament ei denter auter era il fixum dalla suprastonza communal stipulaus. Quel munta ad in fixum definitiv, senza la pusseivladad d'in alzament annual d'in scalem tenor ina classa da paga conform alla reglamentaziun cantunala. Quei ha per consequenza ch'ils commembers dalla suprastonza communal han dapi otg onns giu negin alzament da lur indemnisaziuns, quei ch'ei buca en uorden.

Il temps ei semidaus ed il pensum da lavur dalla suprastanza communal ha priu tier en tuttas spartas ed ei era buca vegnius pli sempels. La definiziun dil pensum da lavur total dalla suprastanza cun ina piazza cumpleina da 100% s'auda en nosa vischnaunca definitivamein tier il vargau. Il pensum dil president communal munta, senza ch'el surprandi pli ch'in ton lavurs operativas, minimalmein a 75% e quei senza risguardar tut ils termins da representaziun, contacts sur firaus, sondas e dumengias e dabia auter. Tut priu vegn quel bein sin in pensum dad 80-100%. Il pensum d'in genau ei cun 10% valetaus sil minimum. Bein dat ei tier la lavur dils singuls departaments differenzas tiel pensum da lavur, denton vegnan era els mintgin sin in pensum da 20-30%. Buca mintg'ura sto esser pagada, denton sto l'indemnisaziun dalla suprastanza esser aschia, ch'ins vegn da motivar convischinas e convischins da star a disposiziun per in da quels posts.

Uonn han liug sco mintga quater onns las elecziuns communalas. Il president communal actual ed in genau han demissiunau sin la fin dalla perioda d'uffeci. Ei semuossa danovamein ch'igl ei tut auter che sempel d'anflar candidatas e candidats per quels posts. Cunzun pil post da president communal e pils ulteriurs commembers da suprastanza ei il regulativ d'indemnisaziun actual in summa buca attractiv e motivescha buca da candidar per in da quels uffecis. La situaziun dad haver sur plirs onns, resp. sur pliras periodas d'uffeci, negin alzament da paga sa buca motivar personas qualificadas en bunas plazzas per ina midada vi ella politica communal. Vulein nus haver el futur hablas personas che stattan a disposiziun per nos impurtonts uffecis communalas, stuein nus esser prompts da porscher in pagament adequat. Sco gia menziunau tonscha in pensum total da 100% d'ina piazza per in binton buca per ademplir la lavur dalla suprastanza communal. In alzament mudest sin 115% ei segiramein giustificaus. Per haver in tractament equal agl ulteriur personal communal, duei l'indemnisaziun dalla suprastanza communal vegnir adattada onn per onn alla prestaziun ed all'incarica. Per indemnisar adequatamein l'incarica d'ina suprastanza communal ei ina remuneraziun tenor classa 23 (min. frs. 119'327.--/max. frs. 169'455.-- incl. 13avla paga) dalla scala dallas pagas dil cantun Grischun segiramein giustificada.

L'indemnisaziun dalla suprastanza communal duei naven digl onn 2021 vegnir adattada sco suonda (art. 3 al. 2 entochen 7 dil regulativ d'indemnisaziun):

*<sup>2</sup>La lavur dall'entira suprastanza communal vegn indemnizada cun 115 % tenor la classa 23 dalla scala dallas pagas dil cantun Grischun.*

*<sup>3</sup>Il temps d'engaschament dil president communal munta a 75%. All'entschatta dil temps d'uffeci duei la paga dil president communal muntar a frs. 115'000.--.*

*<sup>4</sup>Igl engaschament fundamental dils ulteriurs suprastants munta a 40%. All'entschatta dil temps d'uffeci duei la paga dil singul suprastant muntar a frs. 15'300.-- (10%).*

*<sup>5</sup>El fixum dalla suprastanza communal e dil president communal ei l'indemnisaziun per tutta lavur ordinaria (inclusiv sedutas da suprastanza e dil cussegl da vischnaunca) enteifer igl intschess dalla Surselva cuntenida.*

*<sup>6</sup>Quels fixums vegnan adattai alla carischia conform alla reglamentaziun cantunala e per regla annualmein cun in alzament d'in scalem tenor la classa 23 dalla scala dallas pagas dil cantun Grischun.*

*<sup>7</sup>Tuttas indemnisaziuns per mandats ufficials en num dalla vischnaunca van en cassa communal.*

Las consequenzas finansials dalla midadas proponidas semovan entuorn frs. 28'000.--. En vesta allas impurtontas incaricas ch'ina suprastanza communal e cunzun ch'il president communal han d'exequir ei quei augment giustificaus. Cun quei augment vegn plinavon creau la basa per saver occupar ils actuals posts vacants ell'executiva communal.

Ella preambula dil regulativ d'indemnisaziun ei menziunau ch'il cussegl da vischnaunca relaschi il regulativ sebasond sin art. 36 al. 1, lit. c dalla constituziun communal. Il relaschar regulativs da salarisaziun schai tenor art. art. 36 al. 1, lit. d en cumpetenzza dil cussegl da vischnaunca senza suttametter quei conclus al referendum facultativ. Per quei motiv ei il conclus dil cussegl da vischnaunca dils 22 da zercladur 2012 davart l'approbaziun dil regulativ d'indemnisaziun buca vegnius suttamess al referendum facultativ. Sebasond sin quella situaziun duei la preambula el regulativ d'indemnisaziun vegnir adattada taluisa, che la basa da relaschar il regulativ d'indemnisaziun sebasea sin art. 36 al.1, lit. d.

## Proposta

Considerond la motivaziun suramenziunada

### **p r o p o n a**

la suprastonza communal al cussegl da vischnaunca d'approbar la revisiun parziala dil regulativ d'indemnisaziun.

Suprastonza communal Disentis/Mustér  
Il president: Il canzlist:



Robert Cajacob



Andri Hendry

Disentis/Mustér, ils 20 da fenadur 2020

- Regulativ d'indemnisaziun revediu